



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Was im namen des || Heiligen Euangeli vnser Herrenn ||
Jesu Christi/ ietzund zů Bon[n] jm Stifft Cöllen/|| gelehret
vnnd geprediget würdt.||**

Bucer, Martin

Bonnæ, [1543]

VD16 B 8955

Welche artickel zu Regenspurg verglichen.

urn:nbn:de:hbz:466:1-36817

So vil dan meines G. Herzē eygen sententz vñ handlung vff dem Reichstag zū Regenspurg / belanget / weiß man auch das wol / das sein C. F. G. sampt andern Churfürsten / geschlossen vnd der Keyf. Maieft. gerathen hat / das nutz vnd güt seye / die verglichen articulen güt zūhalten / vnd es bey den selbigen bleyben zūlassen. Ja hat auch die R. N. andere Churfürsten gebeten / das die ferner mittel vnd weg suchen vñ fürnemen wolten / noch meer streytiger articulen zū vergleichen.

Nun seind aber der Keyf. Maieft. von dē colloquenten / als vnder jnen verglichen articulen übergebenn / so das büch das der Keyf. M. sie / die colloquenten nach dē gesprech / vberantwortet habē / in sich haltet. Vnd das gegen die Protestierenden nichts einbracht haben.

Welche artikel zū Regenspurg verglichen.

Vnnd in den selbigen verglichen articulen / dagegen die Protestierenden nichts einbracht habenn / findestu Christlicher leser dise hauptstück vnnd lehre Christlicher Religion.

Von der schepfung vñ natur des menschen / vor vnd nach dem fal / vnd dem freyen willen.

Von der erbsunden / deren verzeyhung im tauß / auch von der suchte vnnd gebrechen / so von der erbsunde in den Christen noch bleyben / daher sie nimmer on sünde / vnd feyl sind.

Von der ganzē Justification / wie wir vor Got from vnd selig werden / allein vß der freyen barmherzigkeit Gottes / vnd dem verdienst vnfers Herren Jesu Christi.

Von dem waren glauben / güten werckenn / der selbigen lohn / vnd auch vnuolkomenheit.

Von der waren Reuw / vñ widerkerung zū Got von den sünden.

D iij Von

Von den Sacramenten das die also sollen dargereicht
vnd empfangen werden / das sich in denen nit vff
das vssere werck / sonder allein vff die genade Gottes /
vñ gemeinschafft Christi jederman verlassen solle.

Das man die Sacrament vnd andere kirchen übun-
gen der massen verrichten soll / das dem glaubigen vol-
cke der Gotselige verstandt diser dingenn / vñnd sein
Amen nit entzogen werde.

Das man der abgestorbenen Heyligē also gedencfen
solle / das man Got in jnen lobt / vñ jrem glauben nach
folge / kein vertragen vff sie setze / jnen nicht opfere / sie
auch nicht vmb hülff anruffe / sonder allein Got vnser
ten einigen helfer.

Das man nit für der Heyligenn gebein halte / dauon
man nit weys / das sie ware gebein der Heyligenn sind /
das niemandt vff warhafftigs heyligthumb etwas
vertrauwen setze / oder es anbette.

Das man keyne bilder / dan warhaffter thaten vnd
hystorien habe / vnd allein zu der gedechtnuß der selb-
igen / das ihnen kein Götlich Krafft zugegebenn werde /
sich deren niemand getröste / niemand bey ihnen Gots
dienst anrichte / vnd übe.

Also auch / das zu vernehmung der kirchen / vnd zu al-
len kirchen dienst niemand angenommen werde / dan der
darzu tauglich vnd bewert sei / darumb man die rechte
wahl vnd bewerbung deren / wie die in den Canonibus
dargegeben ist / wider anrichten vnd halten solle.

Das ein jeder seinen dienst selber / vñnd getrewlich
vfrichte / vnd alles one vergeltung / das alle Symoney
von der kirchen hingenomen werde.

Das auch ein jeder zu seinem eigen vñ einigen dienst
geord-

geordnet werde/ vnd desselbigen vßwarte.

Das sie eines vnstrafflichen lebens seyen/ vnnnd das die straff der canonum gegen denen/ so ergerlich oder argwenig leben/geübet werde.

Das alle Christen/was alters vnnnd stands ein jeder seye/vß Gottes wort/ihr gepür vnnnd gehorsame Gottes/fleißig vnd eygentlich geleret werden.

Das der Christlich Bann wider in Christlichen brauch bracht werde/ damit würde der erschrecklich mißbrauch des Christlichen bannes/ das man schuld einbringet/vñ für die absolution gelt nimmet/bald ab geschaffet werden.

Disse artikel/ frommer Christ/ vnnnd noch meer sind im gemelten büch verglichen/ vnd der Keyf. Maieft. als verglichen fürbracht worden/ dan die Protestierenden gegen solchen nichts eingeben haben.

Diß alles nun hat mein G. Herz/ mit andern Chürfürsten vßdem Reichstag für nutz vnd güt angesehen/ das es gleich zu Regenspurg in gemein alle stend hetzen angenomē/die Keyf. Maieft. wolt solchs auch gern zugeben habē/mein G. Herz/ hatte auch begert/ das deren artikelē die von colloquenten nit als verglichē übergebē warē/ das ist/ gegē denen die Protestierendē etwa einbracht hatten/noch meer weren verglichē worden.

Nun alles das ich alhie predige/ ist in erzeltē verglichen artiklen gantzlich begriffen/ vñ ein vorbereitung zu Christlicher verglichung/ auch in denen artiklen zu finden/ die im colloquio zu Regenspurg vnverglichen blyben sind.

Also findet sich abermal/das N. G. Hertē niemād mit einiger rechtmessiger vrsachen anziehen möge als
solte

solte er damit/das er mich hie predigē lasset/etwas wi-
der seine selb handlung vff den Reichstagen/der Reli-
gion halb/ thū oder fürnemen.

So vil den die gemeine landschafft dises Churfür-
stenthumbs belanget/haben die stende der selbigen vff
Jüngst gehaltenem Landstag/sein C. S. G. alle ein-
helliglich gebettē/sein C. S. G. wölten ein Christlich
Reformation/wie im Regenspürgischen abscheydt
vfferlegt vnd befohlen/anfahen/vnnd ins werck rich-
ten/So ist/wie nun offt gesagt/mein predigen der ge-
stalt/das es eygentlich dienet/zū einem waren/tath-
lichen/seligen anfang solcher Reformation/das wider-
spil wirdt niemandt mögen darthū. Derhalben mag
auch meinem G. Herren/mit einigem grundt nit zūge-
legt werden/das er durch diß zūlassen meiner Predige
etwas gethon habe/oder thue/das jm gegenn seyner
landtschafft möchte in einigem weg verwißlich seinn/
Ja das von der landtschafft nit solte billich zū vnder-
thenigsten danck/vff jr vorige bitt vnd beger vffgenō-
men werden.

Die drit-
te anlag
vonn der
Person
Buceri.

Nun vff die dritte klag/die ganz vff mein person
gerichtet ist/zūantworten/will ich alles/ob wol meine
widerwertigen/jre klag als ich täglich verneme/eben
weyt anziehen/vffs kürzest begreiffen.

Erstlich höre ich/das sie disses gar seer treybenn/in-
zechen/vñ wo sie gehöre habē/ich sey nit vß jnen/nit jr
brüder/sonder einn widerwertiger/Ja einn fürnehmer
vnder den selbigen/vnd meinen in dem/die/die sich des
Euangelij Christi vnseres Herren/nach der Augspürgi-
schen confession prote stiert haben.

Hierauff